

四庫全書

集部

欽定四庫全書

蛟峯文集卷七

宋 方逢辰 撰

講義

子曰賢哉回也一簞食一瓢飲在陋巷人不堪其
憂回也不改其樂賢哉回也

此一章以聖賢地位觀之簞瓢陋巷乃吾儒本分固非
甚高難行之事何為聖人獨以許顏又何為反覆稱其

賢此當就人不堪其憂看只為衆人於此有所大不能
堪者是以深嘉樂道之正欲學者於不能堪之中自尋
樂處也處富貴未足以觀人處貧賤乃可以觀人處貧
賤未足以觀人處人情所大不能堪處始可以觀人有
天下不與何足以知舜居深山飯糗茹草而後知舜之
為大去齊去魯何足以知孔子厄於陳蔡絃歌自如而
後知孔子之為聖此章以顏子對人言以憂對樂言各
有所指人之本心天理具足各自有一箇至尊至貴的

物事舉天下之物無以尚之豈不大可樂者豈特顏子
有是哉人唯不見所樂是以得志乎富貴則極聲色之
奉窮四體之欲一遇貧賤則戚戚無聊只簞瓢陋巷便
有甚不能堪者唯顏子工夫精到能忍天下不能忍之
窮雖處屢空恬然不以為意蓋其胸中自有大可樂者
天地間更有何物可以易其樂哉人見其陋巷彼不自
知其陋巷人見其簞瓢彼不自知其簞瓢此無他人見
物而不見道顏子見道而不見物也夫子始稱之曰賢

哉回也終之又曰賢哉回也非譽顏子也有所不足於天下之人也稱道顏子之旨愈深鞭辟學者之意愈切夫子之待學者可謂厚矣望學者可謂深矣惟皇上帝降衷於下民人人與之以惻隱羞惡辭讓是非之心此聖賢之鎡基也今人有百金之鎡基者惴惴慄慄日夜護持惟恐為人奪之而貧而天所與我之鎡基倍於百金者萬萬乃反棄之如敝屣而不知惜誠能撥轉念頭移其兢兢護持於彼者以兢兢護持於此祇見其有人

所不知己所獨知之妙而不見其有為人奪而負之憂也昔程子從濂溪先生遊每令尋仲尼顏子樂處所樂何事嗚呼必有事焉必有下手處周子引而不發蓋欲學者深思而自得之吾儕共處斯堂所樂何事盍相與心體而身踐之顏何人哉顏何人哉

子夏曰日知其所亡月無忘其所能可謂好學也已

子夏聖人之徒也子夏之學聖人之學也聖人之學何

學也入乎耳存乎心修於身行於事明五常之理盡五
倫之道也顏子之博文約禮曾子之致知誠意子思之
明善誠身孟子之盡心養性皆是也夫人之生以天地
儲精以五行鍾秀無極之真二五之精合而為方寸之
靈聚而為百骸之形所以備萬物而參三才者其原有
自来而其本已素立矣然才稟於氣而性原於理窮古
今亘宇宙寓於流行而不易者理也往來盡摩雜揉交
錯而無一定之體者氣也氣惟無一定之體故以流行

於兩間者驗之光風麗日之景恒少風雨晦冥之變恒
多則人生而隨遇者至清極淳之氣不易得而偏倚濁
駁之分不能齊固其所也惟聖人之生也得其秀之秀
故氣清而義理無不明質淳而邪穢不能入由聖人以
下雖大賢之資一有纖毫之累亦必資學問之力以修
治之自帝堯有匡輔翼之言大舜有直寬剛簡之命
其轉移變化之功已見於當時矣然學之道至三代而
益明其見於書則曰學於古訓曰惟學遜志曰終始典

於學曰學古入官曰不學牆面見於詩則曰學有緝熙
於光明隆古聖王未有不以學為要務者也吾夫子生
於衰周不得位以行其道而天命在躬夙夜祇畏閔當
世之人去堯舜禹湯文武之世遠而不聞大道之要當
楊朱墨翟異端之說行而不免他岐之惑乃以身任大
教繼往聖而開來學推明大學之道昭示明德之方使
人人皆得以消磨其物欲變化其氣質而為聖賢君子
之歸何其幸也夫以常人之資而欲為聖賢之事耳目

口鼻之蠢然聲色臭味之交接愚者欲明而懦者欲立
頑者欲廉而薄者欲敦以一心而明五常之理以一身
而全五倫之事天下之義理無窮而工夫有限代間之
人生有期而白日不再苟非勉焉孳孳克勤無怠則查
滓未融而邪穢已入己之所學其能迄用有成也幾希
矣此夫子所以拳拳於學有時習之誨而又曰學如不
及猶恐失之者此也聖門之徒三千夫子獨稱顏子為
好學蓋以顏子明心力行克己復禮所學者得聖人之

道也學之得其道而又能竭其才夫子所以既許其不
惰而又惜其未見其止也顏子終能至於去聖人一間
者豈繆悠之功所能及哉子夏之在聖門篤實之功亞
於曾子而身居文學之科其所謂學者皆人倫日用之
道誠篤切實之功也其垂訓以勉人曰日知其所亡月
無忘其所能可謂好學也已矣夫為學之道內明五常
之理外盡五倫之事變氣質於有生之初絕物欲於有
知之後必資師友之講明方冊之誦習然後能開其心

術見於躬行然其殫日夜之力嚴理欲之辯使朝有所
詢夕有所考晝有所作夜有所思則志於緝熙功無間
斷人心之罅隙不開本體之虛靈不昧矣其或玩物弛
心廢時亂日於學問思辯不能致耳目手足無所加至
於時弛歲去老死無聞豈不重可惜也為學之道若陟
遐必自邇若升高必自卑故當自強不息勉循循為
山未成而加一簣之土掘井未已而見九仞之泉溫故
而知新崇禮而廣業向之得於講明而見於誦習者既

有默契於心知而行之拳拳奉持服膺弗失此古之人所以一飯不違跬步必思盤器有銘几席有戒參倚之有見顧諟之弗忘所以固守其德也其或執之不固守之弗專或存或亡乍得乍失則一暴十寒而生意弗存半途而畫而前功盡廢義理之性既無學問之推充血肉之軀不勝外誘之紛擾則杯水不救於車薪五穀不踰於萑稗雖具人之形當士之名飲食男女無以異於衆人存心制行不能遠於禽獸中心冥冥醉生夢死豈

不重可哀也子夏之訓蓋深勉夫有志於學者必當日
新其功有以自考一日之間自旦至暮我於義理未知
未能則深以為恥一月之間自朔至晦我之學問已知
已能則固守而弗失夫如是故日引而月長日就而月
將自有學之初以至於一息尚存勉焉以盡其力惕焉
以殫厥心其得不謂之好學之人乎子夏之所以居文
學之科者此道也故言此以示人欲人人皆然而底於
道也學者觀此豈可荒嬉而不知所以自勉耶某負戴

經籍而來山中諸友不以某為不肖而屑與某交修游
息嘗不自揣而述所聞於先師者告諸友矣今觀氣化
之流行寒暑之迭興以春而夏夏而秋秋而冬矣竊以
諸友之日有所亡而月未有所能為憂也良月初吉冬
序伊始故述子夏之訓以相告語冀諸友思齊於聖人
之徒而景行於聖人之徒也非徒守方冊以為勤誇誦
說以為能而已當以明物察倫治心修身為要務在乎
為人子者必盡孝於其親為人弟者必盡悌於其兄為

卑幼者必盡敬於其長手足動靜必知天理之所存耳
目口鼻母為人欲之所汨以消融其渣滓以蕩滌其邪
穢子夏之所謂學也深致其力復考其成使進修之效
日異而月不同此子夏之所謂好學也苟為不然徒事
口耳虛費歲月堯言孔誦而不知求聖賢之心禹行舜
趨而不免為禽獸之行若是則非徒爾父兄之所憂抑
亦吾師友之所羞秦穆公有言曰我心之憂日月逾邁
若弗云來此某之所以區區告勉學者當痛心刻骨而

致力於學也

齊景公問政於孔子孔子對曰君君臣臣父父子
子公曰善哉信如君不君臣不臣父不父子不
子雖有粟吾得而食諸

夫彛倫者人道之大綱政事之根本也第彛倫之在人
內而至尊者無出乎父子外而至大者無出乎君臣苟
在家父焉而能盡父之慈子焉而能盡子之孝則必有
以正倫理篤恩義小大咸得其宜而家道齊矣在國君

焉而能盡君之道臣焉而能盡臣之忠則必有以正朝廷平庶務上下咸得其所而國體治矣然則為政之本又豈有出於君臣父子之外者哉是時齊之景公內多嬖媵太子不立而父子之道睽外則陳氏厚施擅用國政而君臣之分亂故聖人因景公之問政而以君臣父子之說告之可謂至要切矣景公亦深有感於斯故以善哉之言贊之又從而嘆之曰果使君而不君臣而不臣父而不父子而不予上下之序紊綱維之義隳而法

令不行禍亂尋起矣雖有穀粟之多尚安得而食之哉此必然之理也其後卒不免於篡弑之禍蓋由景公知善其言而不能自振故也間嘗論之國土至廣也人民至衆也苟欲使之安如泰山固如磐石非上下之分定不可也不然一日之間其或君不能君臣不能臣父不能父子不能子則家不可為家國不可為國而生民之命有不可得而保者矣論至此而後知吾儒之道大而有以扶植天命維持世教而為生民休戚之所繫者

正在於君臣父子秩然有序而不亂也若易之六十四卦而以乾坤為之首春秋之大一統而以王正月為之先其他如詩書之勸戒禮樂之防範無非欲詳夫君臣父子彝倫之道而已無他事也然則為政者不此之務而規規於事為之末而欲致國家於平治者無此理也讀此章者所當知

子貢曰夫子之言性與天道不可得而聞也

公治長

子罕言利與命與仁

子罕

孟子曰惻隱之心仁之

端也羞惡之心義之端也辭讓之心禮之端也

是非之心智之端也

公孫丑

孟子道性善言必稱

堯舜

滕文公

孟子曰盡其心者知其性也知其性

則知天矣

盡心

孔子教人未嘗不言命與仁未嘗不言性與天道魯論
二十篇何莫非是理而何隱乎爾也門人以為罕言以
為不可得聞何也蓋孔子之教人只在日用處凡所言
仁皆是為仁之方不是正言仁之體所言性命天道皆

盡性至命事天之事未嘗推極性命天道之原也孔子不言心性而孟子開口便說性善說盡心知性存心養性孔子只說一箇仁孟子乃說出仁義禮智四端孔子一部論語盡是教人就起居飲食應事接物上做工夫孟子七篇直教人就心上存養孔孟之教人豈有兩心二道時不同也先儒曰春秋猶論是非戰國純論利害春秋之時文武之澤未斬義理之在人心者無恙故列國君卿大夫之自謀及辭命往來與隣國之可否者惟

論理之是非不論勢之強弱戰國時先王之道影滅跡絕通天下不知義理為何物列國君臣與縱橫之士謀其國者唯利害而已不識天下人心有是非枉直也以此觀之則春秋時人心未亡戰國時人心亡矣孔子時人心未亡愚夫愚婦皆可與知可與行故教人以忠信而已入孝出悌而已先行後言而已仲弓問仁則曰出門如見大賓使民如承大祭己所不欲勿施於人而已樊遲問仁則曰居處恭執事敬與人忠而已至於夫子

平日所身教者亦不過閭閻侃侃聲色容氣之間蹢躅
愉愉進退揖讓之際凡形跡之粗事物之末皆帝衷之
流行天則之呈露故夫子曰吾無行而不與二三子者
吾無隱乎爾也孟子之時人心已亡舉國皆病狂惑門
人高弟尚未能篤信其師說謂舜不能怨慕者有之議
周公不仁不智者有之疑孔子主癰疽瘡環者有之以
管仲晏子為名世以公孫衍張儀為大丈夫夫人之良
心陷溺如此非湔腸滌胃破骨洗髓不足以療之故孟

子不得不直從其本心下手也譬人有不識五臟而不
信醫者醫為之剖其腹而指示之曰某為心某為肺某
為腸某為胃然後病者方自信孟子無奈戰國人不識
四端何直從其軀殼之內標出而示之曰此天賦於爾
者謂之命此爾受於天者謂之性此包性命管攝乎衆
理者謂之心如此為仁如此為義如此為禮如此為智
使人人自見得自信得然後吾之教可入而天理不亡
孟子之喚醒人心其苦切有如此者雖然孟子豈徒教

人以體察而已哉其操存其涵養其擴充七篇之書反覆言之詳矣又體驗以後之實踐工夫也孟子之救人心苦切如此端的如此其工夫詳密又如此後世異端之家乃有竊此以為識心見性之把柄者此不足辨也近世學者亦有得體驗之緒餘而強為執持者究其歸亦同於異端之病而已矣今之學者讀孟子必當涵養於未發之先以立其本體驗於將發之際以審其幾又操存之以定其所守充擴之以極其所止天所賦命盡

在日用之間吾所受性皆為躬行之實以此讀孟子然後不負孟子苦切之心

景春曰公孫衍張儀豈不誠大丈夫哉一怒而諸侯懼安居而天下熄孟子曰是焉得為大丈夫乎子未學禮乎丈夫之冠也父命之女子之嫁也母命之往送之門戒之曰往之汝家必敬必戒無違夫子以順為正者妾婦之道也居天下之廣居立天下之正位行天下之大道得志與

民由之不得志獨行其道富貴不能淫貧賤不能移威武不能屈此之謂大丈夫

昔者戰國之世七雄爭長仁義之路荆棘先王之教不明一時才智之士林立輩出不免利祿之趨功名之務而已又安知聖賢之學正己正人之道哉此景春所以有公孫衍張儀之問也蓋公孫衍張儀之為人專以權謀之術遊說於列國縱橫之法連結於諸侯得志橫行氣燄可畏當時之人尊仰敬畏之不暇遂以大丈夫許

之且言一怒則諸侯為之恐懼蓋能使相攻伐也安居則天下為之休息蓋能使相安於無事也何則蓋七國之君一切以富國強兵為務其心已陷溺於利欲聞利則喜聞害則懼故皆為其所愚惑苟有丈夫之氣以道義為主者又安能惑之哉故孟子叱之以是焉得為大丈夫乎但子未學禮故耳古者男子二十而冠三加三祝父必命之女子之嫁也施衿結帨母必命之及女子之往也送之門而戒之曰汝往至夫家必敬之戒之敬

恭聽宗爾父母之言而不可違也夫以順從為正者乃
妾婦之道今二子惟知以阿諛苟容竊取權勢以僥倖
於一時豈非妾婦之道又烏得為大丈夫哉果能居仁
由義以禮自度養其大者不為小者之所奪則能超出
於一時而不屈於萬物是乃大丈夫也蓋廣居者仁也
仁者之心廣大寬平以四海為一家中國為一身故曰
天下之廣居居乎此則舉天下卑污之私皆不足以動
之矣正位者禮也禮則尊卑大小進退出處皆有一定

之節故曰天下之正位立乎此則舉天下不正之事皆
不足以干之矣大道者義也義則事物之所宜乃天下
人物之所共由者故曰天下之大道行乎此則舉天下
邪媚之行皆不足以趨之矣若然則得志以行道則可
以使民共由之而皆歸於仁壽之域不得志獨行於身
則使此身常立乎正大高明之地矣雖多財而富有位
而貴亦不能淫蕩其心矣雖無財而貧無位而賤亦不
能移易其節矣雖威勢武勇之可畏亦不能挫辱其志

矣何則其所居者廣所立者正所由者大故也則視彼區區以利害之說愚惑庸常之君以竊取苟容於一時者誠不足道又烏可以大丈夫言之哉嗚呼正學不明人心陷溺遂使智能有用之士如瞽者之無所見聾者之無所聞甘心浸淫為妾婦苟賤之行而不自知雖孟子樹立如此之卓卓辯論如此之昭昭而卒無一人能自拔卒無一人能委而用之致使七國之君相胥於滅亡海內之民相胥於塗炭而後已豈天未厭亂而致然

也歟抑邪說橫流而不可遏之也歟是未可知也後之欲為大丈夫而為國家者豈不可戒而可觀也哉

孟子曰故凡同類者舉相似也何獨至於人而疑之聖人與我同類者又曰口之於味也有同者焉耳之於聲也有同聽焉目之於色也有同美焉至於心獨無所同然乎心之所同然者何也謂理也義也聖人先得我心之所同然耳

告子上

此一章可以見孟子之救天下者直從人心上做起心

之虛靈知覺一而已矣豈有二哉以飢食渴飲之情言則謂之人心以天命之性言則謂之道心飢食渴飲之情雖聖人無以異於衆人天命之性雖凡民亦與聖人同爾春秋已降傳心之學不明天下之人梏於形體之私而昧乎性命之正但知耳目口體之欲與人同至於本心之當然不可易者乃與人異孟子痛之哀之諄諄然告之曰凡我同類者舉相似也何獨至於人而疑之又曰聖人與我同類者蓋謂夫知覺運動凡物之類莫

不相似而況人乎雖聖人亦人耳今夫耳目口鼻四肢
之所欲一有不得則隕護不能堪至於惻隱羞惡辭讓
是非之天則乃吾所自有者則遜之他人曰此聖賢事
也又否則曰非不說子之道力不足也是以孟子又惕
然警之曰口之於味也有同者焉耳之於聲也有同聽
焉目之於色也有同美焉至於心獨無所同然乎蓋以
飢食渴飲舉天下人人所同而方寸之微乃獨不然此
孟子至痛至切之辭猶懼夫人未之覺也又提起此心

曰心之所同然者何物也理也義也理以體言義以用
言聖人之所以為聖人者存此而已堯舜禹之授受以
傳之者此也湯武之弔伐以救之者此也吾夫子之作
六經以抗起者此也唐虞三代洙泗之聖人所以出類
拔萃為萬世立極者豈有異於人哉特先知先覺乎此
而已矣故曰聖人先得我心之所同然耳夫世教不明
人心不同久矣孟子必欲強其所異而歸之同自常人
觀之何自苦若是然孟子之心天下之心也蓋其心元

自有一人言
卷七
自有不得不同者夫所欲有甚於生者所惡有甚於死者非獨孟子有是心人皆有之今天下壞證急在人心吾儕登斯堂也閉戶造車出門合轍同此心也同此道也羣居講習又何為哉乃所願則學孔子

孟子曰仁也者人也合而言之道也又曰仁人心也

先儒論仁至矣盡矣其最善名狀者無如謝上蔡指草木之核種之即生道以為仁其中一包皆生理也雖然

特借草木之核而言耳人之核安在曰心天地之核安在曰人夫生生不息者天地之心也然其心不能以直遂必以托諸人人得天地之氣以為形得天地之理以為性故萬物皆備於我而天地之所以生生者實寄吾性分之内天高地下一日無人則天地特塊然者耳故孟子曰仁也者人也夫二物相配之謂合仁以性言人以形言仁固所以為人之理人又所以載是理而行之者也離形言性則理何所托以自見故又曰合而言之

道也然而人之所以為人者豈以軀殼為哉天地以生物為心而人又得天地之心以為心者也天地以此心寄諸人豈徒然哉厥初賦與許多道理皆要從人心中抽迸出來如草木勾萌自有勃然不可遏者方其未形沖漠無朕一與物接觸之則生觸著他義則善善惡惡便有廉恥羞惡之心作觸著他禮則尊尊貴貴便有辭遜揖讓之心起觸著他智則辨黑白別香臭便有是非之心迸裂而出上蔡曰活者為仁死者為不仁人心不

仁則天地死矣故孟子又曰仁人心也七篇之書自首至尾切切然以人心陷溺為憂凡教人求教人收教人存教人養勤勤懇懇至痛至切一情之動則曰心之端一思之起則曰心之官見於面則曰根於心害於事則曰生於心物有長短輕重則曰心為甚千言萬語不及其他直是指人之識痛痒有知覺處以示之雖非便以知覺痛癢為仁然欲其切已省察而救活其本心也不然死灰而已槁木而已頑然鐵石而已此之謂不仁列

禦寇莊周之徒正坐此病今天下人心陷溺甚矣急起而救之責在學校心學工夫自我輩始羣居相與所學何事端居靜念我之生也所以賦形宇宙而靈於物者豈空殼哉即天所與我之虛靈不昧至光至明底物事求之收之存之養之體於躬行日用之間著於食息動作之際則夫生生不息者不在天地而在我矣故曰人者天地之心

乾稱父坤稱母予茲藐焉乃混然中處故天地之

塞吾其體天地之帥吾其性民吾同胞物吾與也

西銘之作張子蓋為人局於形體之私自小其身不知身與天地對立而不能盡人道之大也天高地下人位乎中天大地大人居其一故曰予茲藐焉乃混然中處乃者張子惕然自警之辭謂我以眇然七尺之軀乃得與天地對立者豈徒然哉天地之塞吾其體天地之帥吾其性此二句乃人所以得與天地對立者也塞者天

地之氣也。帥者，天地之理也。以充實言，謂之塞以主宰。言謂之帥，其體者，以身體而實踐之也。其性者，以身體而實有之也。二句之上，加一故字，故者，承上而有所用力之辭。乾陽坤陰，此天地之氣充塞乎兩間，而人所得以為體者也。然得其體，必當有以體其體，不體其體，則人與物何以別？體者，一身軀殼，無非造化日月之往來。山岳之鎮峙，江河之流轉，寒暑之代謝，一人之身，天地之所為者，備故曰：天地之塞，吾其體一陰一陽之謂道。

陰陽非道也所以一陰一陽者道也此即天地之主宰也所謂天地之帥也天地以陰陽五行化生萬物莫不命之以是理人所得以為性者也得其性必當有以性其性不性其性則人與物何以異格物致知所以明此理誠意正心所以體此理此性其性之條目也操存之涵養之體察之此性其性之工程也如是則所以主宰者不在天地而在于我矣故曰天地之帥吾其性然而我有此體此性人亦有此體此性物亦有此體此性特人

全物偏故有胞與之分同胞者受氣稟理全無間隔吾與者亦我之儕輩也民飢已飢民溺已溺所以行吾同胞之事也昆蟲草木鳥獸魚鱉莫不使若其性所以行物吾與之事也故吾儒之道必至於此而後為全體大用必盡乎此而後眇然之軀殼始可與天地對立矣西銘一篇綱領在此由此而後皆其體其性之節目父母宗子以下指聖賢在上者言于時保之以下指聖賢在下者言讀西銘者以此體察而踐行之則各有下手處

矣吾儒素其位而行在上之事固有任其責者在下之事我輩之所得為而不為則天地生我何如哉今田野之間骨肉反眼閭里作仇朋友彎弓主奴易位彼安知所謂理一分殊名為儒者不思所以植立抗起之則風靡瀾倒其勢必至於胥為禽獸而已矣凡我同志盍相與努力於斯

周禮鄉大夫之職受教法於司徒退而頒之於鄉吏使各以教其所治以考其德行察其道藝以歲時

登其夫家之衆寡

夫家男女也

辨其可任者

任者謂給繇役

也

國中自七尺以及六十

七尺謂祇二十歲以上

野自六尺

以及六十有五

六尺謂祇十五歲以上

皆征之

征謂繇役

其舍

者國中貴者

謂爵尊者

賢者

謂有德者

能者

謂有才者

服公事

者

謂士大夫居官者

老者

謂年尊者

疾者

謂廢疾者

皆舍

舍先儒謂復除

其繇役也

鄉大夫者司徒之屬掌教之官也攷德行察道藝賓賢

能其本職也然於征役瑣細之事亦與焉何也蓋所以

辯貴賤優賢能行弛舍也以歲時登其夫家之衆寡辯
其可任者所以考察其民之可役與否也國中之民自
年二十以及六十野之民自年十五以及六十有五皆
征之此成周繇役之法也國之民年二十則役之六十
則免野之民年十五則役六十有五則免國中晚征而
早舍以地近則役多也野中早征而晚舍以地遠則役
少也其舍者有六貴者賢者能者服公事者老者疾者
皆舍此成周免役之法也貴者不役以其爵尊也賢者

不役以其有道有德行也能者不役以其有才藝也服公事者不役以其居官有職事也老者不役以其無筋力也疾者不役以其不任奔走也此六者皆復除其繇役載在周官所以示萬世昭昭也後世王道不明凡貴者有公事者與老者疾者皆免而獨賢者能者未得復除而與編氓皂隸同受役於府史胥徒之下冠履倒置莫斯為極古者公卿大夫士與庶人各有定分而不相踰越公卿大夫行先王之道以治於朝士明先王之道

以教於鄉庶人服庶人之事以役於野凡學先王之道者謂之士為小人之事者謂之庶人三代之時士庶人家各百畝不以貧富為差而以賢不肖為別世教不修士庶人之分不明為有司者乃欲使士與庶人並役是不察周官之法不知士庶人之各有定分也庶人之役役其力耳吾儒則經天緯地為天下正君臣定父子別夫婦序長幼其為役也大矣今自國及野僕役於主子聽於父妻不敢二其夫幼不得凌其長非儒之教其誰

之功也且有天下者必有所尊而後足以成天下之尊
自古為人主者必折節以下天下之士非尊其人也尊
其道也天地設位道行乎其中綱常禮義自儒者出一
日無此道則強凌弱衆暴寡智鬪智力角力天地間乃
一凌犯角奪之區而已矣然則君天下者乃所以自成
其尊也王制曰命鄉論秀升之司徒曰選士升於司徒
堵不征於鄉不征者先儒謂復除其繇役若此則不獨
周官之法通三代之制然矣乃者上臺有請以三代之

法推而行之江南此尊儒道將以立人極也夫愚請發
明王制以曉未識三代之法者

策

問天文變異及中國夷狄君子小人德刑公私之
異

主意 君子純乎陽明之德則以陽召陽而星
宿清潤君子襲夫陰柔之為則以陰召
陰而宇彗垂妖其端芒兆於君子之身

其證應著於天地之表今日星文示異
所以不責小人而責君子也

考官批

機軸出於胸中華采流於筆下答題不拘題用事皆實事作此者必老手也

對嘗觀陰陽清濁之氣流行於宇宙間在天為禎祥為
祲青在人為中國夷狄為君子小人為德刑公私數者
同一陰陽也雖然天下之陽類衆矣而君子者衆陽之
主天下之陰類羣矣而小人者羣陰之宗然則今日星
文之異其小人為之歟抑君子為之歟世固以是責小

人矣愚獨不責小人而責君子也何者向者共驩居朝
五辰未撫猶可諉也今臯夔進矣將誰諉乎昔者管蔡
在列保章星動猶可辭也今旦奭歸矣將何辭乎曩者
季氏專朝星隕之妖猶曰宜也今宣尼相矣豈復宜有
此乎是則君子有不容不任其責者苟能純乎陽明之
德則於國為覆盂於仁為雨露於公道為權衡其應在
天則析木天街星宿清潤陰不得勝乎陽矣為君子者
不免襲陰柔之為則於國為蛇豕於仁為荆棘於公道

為蹊隧其應在天則孛飛彗流垂妖吐異陽亦不能以
勝乎陰矣是故厯象蒼珠璣衡珠璧非天數之偶符也
唐虞治古俊德者純乎俊德以陽召陽之應如雨之妖
守心之象非天數之適變也春秋世降正人不能純乎
正人以陰召陰之證也迨我國朝天聖之流星慶厯之
太白誠可畏矣惟杜富韓范歐余王蔡諸君子如景星
鳳凰故在天之陰不能以勝在人陽崇寧之彗大觀
之孛未必不可銷也惟奸黨有碑邪等有籍諸君子不

能自白故在人之陽亦不能以勝在天之陰信乎宇宙
之相通一氣耳其端芒兆於君子之身其證應著於天
地之表此猶黃鍾一動則根荄芽甲之下皆春夜氣一
交則么微怪亂之證錯出機緘影響氣類墳廡斷斷乎
其不爽也恭惟皇上寅畏事天固宜衆陽鼎盛羣陰覲
消而乃者正陽之月譴示星文證不虛生何緣而起豈
中國之陽未盛與昔權奸挾敵以固君父之寵三邊清
野不問也於斯時而天變見焉是可曰夷狄之陰召之

也更化以來敵人相噬困于蒺藜泗上凱旋伏戎于莽
晉彗出室胡可移過於遵鑒相屠之時歲星犯月胡可
遜咎於柔然將破之日是則諉之夷狄不可也否則吾
仁之陽未暢與昔權奸以賊吏為公門之桃李永州之
蛇不問也於斯時而天象警焉是可曰刑罰之陰感之
也更化以來謹刑有銘江河疏濶戒殺有詔雨露涵濡
長星竟天非元朔滲漉之朝所宜有字宿歷氏非貞觀
既效之日所宜聞是則諉之刑法不可也又否則公道

之陽未盛歟昔權奸以多詐逢君君娥之啓寵不問也
關子之交通不問也斯時而天戒示之猶可曰私情之
陰召之也令邪徑既窒天日開明倖門莫通雲霧軒豁
偏黨俱無矣胡為箕畢未協乎刑賞平明矣胡為隕星
告變乎是又不然矣然則星文之變胡為而如此乎無
已則君子之陽未純也夫傳說騎箕蕭何應昴君子未
嘗不應於天象攝提之位列卿鉤鈴之司出納天象未
嘗不應於君子故君臣和則三台齊君子多則東壁著

賢人進則少微絢綵其感召如響之答也今天象昭昭
一則曰小人之陰為之二則曰小人之陰為之不知中
台星折可獨諉之張華乎太白襲月可專責之曹爽乎
諸君子盍曰明白洞達者陽也吾未能無覆護揜匿果
非陰乎慷慨奮發者陽也吾未能無依阿渙忍果非陰
乎斷制者陽也今或似味道之模稜任事者陽也今或
類石建之遜避譬如奕棋局面雖改而其間一二著數
未免猶似前日之所為可謂純於陽明乎吾未能純於

陽則召陰盛之變者非私情也非刑法也非夷狄小人
也我也夫如是則位郎星職卿月應功臣之宿符三台
之象者莫不以陽明自厲必洞達明白必奮發慷慨必
斷制必任事則陽亨於復而陰剝窮矣陽長於泰而陰
否消矣星變夫何慮雖然執事所問數條曰仁曰公亦
不可廢也此又在於人主之心乎人主之心事事皆仁
則德性昭明與陽俱盛而至誠暢乎九垓人主之心一
適非公則物欲昏熾而幽明隔於方寸昔紹興三十六

年太白犯前星高宗皇帝曰人君有過天則戒之及懼而改天則愛之次夜而觀太白順軌矣然則以心答天不當如高宗乎先儒曰陽明盛則德性用陰濁盛則物欲行愚請揭是為座右銘謹對

論

禮法之大分如何論

楊奐批 立說得先儒議論行文有前輩氣象

佳作也

論天下綱常之大當自人君立其大者基之夫禮莫大於分分莫大於君君不能自有其大則禮法蕩矣生民之初人未知有君之尊也先王憂焉為之辨上下別等殺而為截然之法法立而禮行禮行而君尊夫為君者盍曰吾之所以獨尊於天下者僅有此分耳使吾一日失此則不能自有其大君失其大則禮法能獨存乎世降叔末此分不明久矣不知先王所以為是禮法者正為君尊地也吾處其大可不思有以守其大乎云云禮

法之分安在乎曰君臣也父子也兄弟也皆分也求其分之大者則同室之分莫大於父同與之分莫大於兄雖然又有大者焉統乎人倫之上而居分之至尊者非君歟夫以四海之廣兆民之衆受制於一人雖有絕倫之力高世之智莫不奔走而服役者豈非分之至大哉雖然處天下之大必有以守其大是故秩於天庸於舜謹於文武成王周公自朝廷宗廟達之於州閭鄉黨自閨門衽席而至於天下國家者所以立其大也昔仲叔

子奚有功於衛辭邑而請繁纓孔子以為名者君之所
司季氏在魯擅顓臾之伐孔子以為天下有道禮樂自
天子出誠以名與禮樂天下大分也而君不能司之天
子不能自出之則失其所謂大矣一失其大則天下無
復綱紀禮法其不墜於地者幾希矣乾尊坤卑禮之始
也聖人法焉制為長幼之節疏戚之差若足矣未也又
從而為之法焉車服有制宮室有度此法也小大有經
尊卑有紀此法也總而為吉凶軍賓嘉散而為三千三

百之儀者皆是法焉若足矣亦未也士庶人之上為之
置卿大夫卿大夫之上為之置侯伯焉侯伯之上為之
置三公焉等級而上至於天子其分極矣為天子者盡
曰先王制禮所以為是差次焉者正以成吾之尊也吾
處至尊之分而不能自有其尊得乎士大夫分職自我
分之可也如晉之六卿魯之三家則分陵矣諸侯建國
分土而守自我建之可也如韓魏以請命而侯則分僭
矣三公分命總方而議自我命之可也如畀虢貳鄭之

事則又自壞其分矣分不克守則失其為君之大君失其大如禮法之陵蕩何春秋皆此類也况荀卿之時乎卿也起視四顧無一可人意著書立言而有禮法大分之語卿之意深矣楊倞不足以知此以任人職分釋之吁卿之意或者正為名分憂豈在區區分守乎雖然大分一語卿言是矣然載之王霸之篇君子不無遺論焉夫禮法之廢正為五伯壞之耳卿方欲遏頽瀾不能尊王抑霸顧以王霸並稱而名篇不觀筆削之經乎子拒

父者罪之而父子之分明庶奪敵者貶之而兄弟之分
明臣召君者諱之而君臣之分明然則春秋一書其禮
法之大宗乎此見春秋者有周禮盡在魯之嘆而後儒
亦曰春秋為一王法謹論

策題

問戰勝攻取不如韓信此將所以貴乎武方叔元老克
壯其猷此將所以貴乎舊詩書禮樂惟卻穀可此將
所以貴乎儒霍去病之常天幸王欽若之祿未艾此

將之所以貴乎福四者之中孰為善歟兩軍對壘使
詐使貪將不武則敗守西河使隣國不敢向非起不
能築長城使北胡不敢近非恬不能豈將當以武為
上歟或者又曰韓彭英盧危則要安則背如養鷹鷂
反費絛籠然歟否歟無已則改用儒歟鳴條之師伊
尹主之東山之師周公將之豈將當以儒為上歟或
者又曰陸機非不儒而不能免河橋之敗房琯非不
儒而不能救陳濤之奔儒而不真則反敗事然歟否

歟無已則改用舊德歟必欲取荆非王翦不可必欲
討蠻馬援尚堪一行新者之疎不如故者之練豈將
當以舊為上歟或者又曰田單之攻燕則下攻狄則
不下前日身操版鍤則有死之心無生之氣今日黃
金橫帶則有生之樂無死之心此魯仲連所以逆料
其不勝如此則將之舊者豈又不可用歟武帥之敢
於鬪則懼其難馭文帥易於制則懼其罔功舊帥熟
於兵則又懼其已驕舍是三者之外無已則擇一福

帥用之可歟福星臨吳則風燎可以走曹瞞而不必
周瑜王氣在晉則草木可以感符堅而不必謝安然
歟否歟乃者荆湖易帥以驍將攝之豈非以武帥緩
急可鬪歟未幾改命資帥又豈以文帥易駕馭歟潭
湘分命起督帥鎮之又豈以舊帥久熟備禦歟或謂
荆閩不如就畀攝帥或謂不如移畀督帥孰為便歟
然三帥之中當誰畀歟雖然朝命已授鉞矣今之謀
帥固不敢仰視伊尹周公若周謝之事亦可憑籍福

星王氣之所在而收風燎草木之奇功否歟憂國者
固望之幸之諸君試借一著

問祭之重其享神也莫重乎牲其求神也莫重乎樂與
灌郊用犢尚純慤也明堂我將我享維羊維牛說者
謂明堂不以犢而以牢蓋牛羊豕備曰牢明堂不以
犢將不純於慤歟帝牛不吉以為稷牛

祀后說
稷者

者謂卜為帝牲不吉則以為配祖之牲然則祭祖以
不吉之牲固無歉歟帝牛繫於滌芻之三月稷牛維

具說者謂稷牛惟臨時取備然則祭祖不闕恭為疑

歟商人尚聲先作樂而後迎牲周人尚臭先灌而後迎牲二者求神孰近歟樂所以求諸陽灌所以求諸陰魂氣歸於天魄氣歸於地當合陰陽求之今各尚其一何歟禮曰樂之號所以告詔天地之間說者謂用樂之音呼號告於天地庶乎神聞之而來然則果能必其來格歟否歟又曰灌用鬯臭陰達於淵泉說者謂用鬱鬯灌地則臭氣達於淵泉然則一瓚之鬯

果足以裂地而直達歟周禮曰樂七變則天神降八
變則地祇出九變則人鬼格然則天神地祇人鬼必
將俟七八九變而後至歟周禮曰以獻裸享先王則
享人鬼皆當灌也然宗廟用灌而明堂配祖不用灌
又何歟豈祖宗在天不當求之陰歟所謂貴純貴聲
貴臭三者之義可得聞歟子入太廟每事問况三載
明禋於此有未達敢從諸君質之

問中庸曰國家將興必有禎祥不然必有妖孽見乎著

龜動乎四體然則中庸之所謂妖尚隱於微者歟然
遽曰見動何歟乃者蜀閬走驛以嘉叙地震電擊水
怒山裂上聞京城盛夏而大風拔木發屋此非天妖
歟所以召此者何失銷此者何修歟或曰天作孽猶
可逭然歟否歟豸冠執白簡擊二豎子此非人妖歟
然膏之上育之下鍼之不達藥之不及將何道而可
歟彼且操戈以逐臺臣是可忍孰不可忍歟豸所以
觸邪令反助邪以觸豸宜以言者為妖歟繼之者將

言歟勿言歟縉紳中嘗有移書廟堂者亦弗見聽將
弗能救歟於登崇俊良之中而首為掾豎逐直臣不
為除目玷歟去天之妖不過修德至於人妖甘者如
薈豈終無良劑歟過庭緒論可得聞歟恐謄題之窘
不欲泛引故事答者將勿畧

碑銘誌

唐侍衛都指揮使王押衙太尉碑

聖人之制祭祀也法施於民則祀之以死勤事則祀之

以勞定國則祀之能禦大菑捍大患則祀之故厲山氏
之後至今祀以為稷共工氏之子至今祀以為社此皆
有功烈於民者青溪之東去縣七十里安樂鄉之楓溪
有唐侍衛都指揮王押衙廟其始父老信其靈異尸而
祝之凡冠婚喪葬營繕莫不質其吉凶而後即事歲有
水旱札瘥禱之立應淳熙八年刪定陳公晁訪其靈跡
紀之縣誌越嘉定甲申戴侯師聖尹茲土以秋涸乞靈
而雨以其靈跡聞於朝勅封靈惠廟忠順英烈侯仍捐

已俸增葺祠宇檄少府董役不月而成蹇義屹峙廟貌
一新迨淳祐辛亥神之裔家於東土歲奉宗祀者來請
予紀其實鏡諸砥以詔不朽予按縣志及索其舊碑所
為文得其始末神生於唐大中元年神少負節槩涉書
史慷慨沉毅膂力絕人長於弓馬劒槩世迄僖昭政權
旁落藩方尾大翹足伺釁者環天下皆是神獨抱膝長
吟自比諸葛乾符中裨將王郢倡亂兩浙鎮將董昌以
戍兵單寡檄鄉井兵未有應者神首舉義旗與錢鏐協

志應之郢既討平逆巢之釁作擁衆長驅攻掠淝東饒
信池宣歙等郡神復乘勝擊賊合鏐兵誓死俱奮不介
馬馳之所向輒捷賊畏其鋒遁自采石渡淮時高駢為
諸道行營兵馬都統聞賊不犯境壯之而奏於朝以神
為都押衙鏐為都指揮使乾寧二年董昌據越叛朝命
神偕鏐兵討之未幾昌就擒露布獻捷以功遷侍衛親
馬步軍南北都指揮使而鏐加鎮東軍節度使是時宦
豎驕橫如田令孜韓全誨等劫脅人主東西出其意神

實憤之而謀適不用無如之何同列諸帥如李茂正朱
全忠等無非挾強大冀非望之人神實恥之而大厦將
傾非一木所能支舉目山河終夜雪涕於是浩然有歸
志麾衆而東曰吾姑俟聖人出也居無何闕庭蹀血而
唐室丘墟五十年矣我太祖皇帝六龍御天海外有截
是何神先見著龜也神所居即今之安樂鄉環境十里
皆道峯矗壁大者龍跳小者虎臥下者崎嶇迤邐淺露
縈迂昂者層稜嶽嶽形峭狀怪觀乎此使人心膽雄偉

志氣踴躍其上梗楠杞梓幽幽陰陰蒙

闕

蒼苔絡紫

蔓霞霧卷舒雲月吞吐觀乎此使人胸襟放曠起高蹈
塵表之思地靈人傑固應不凡也然神猶以平陸千里
大江遼絕民旅擔賫酸股脫膝遂規度浚治為河湟以
通舟楫千夫荷插萬畚齊作功未畢而殞星告變今天
樂觀左遺跡如故觀者至今恨之神諱克儉字子廉墓
在昌期鄉之柘源諸部曲所塋也神叔父長史昌胤仕
唐昭宗神之兄副都指揮使克勤仕唐宦遊寶婺因家

焉神之姪承義仕後周太祖為廷尉延壽仕吳越錢氏
為主簿諸誥牒尚存其後枝葉碩大且繁今居淳安者
皆其裔也嗚呼盛德必百世祀神有功於國有功於民
有功於禦菑捍患其世祀也宜哉遂為之銘曰皇路嶮
巇誰扶誰持惟神驍勇東擊西馳有嚴鉞鉞所向輒捷
蹴郢走巢翦昌定越外叛未清內奸已成何物闇豎納
兵闕庭天翻溟渤一簣莫窒明哲保身進退不失殞星
於東乃顯神功生封死廟嗚呼英雄

行狀

宋知郡寺丞俞公行狀 并銘

公舊諱忱一

上字本從言從成

後改公明字則明為君避也曾

大父簡大父謙咸隱德弗耀父點自號雲巖居士贈奉
議始祖稠仕吳越為睦刺史因家焉今為嚴之分陽公
少穎書一覽輒記雲巖公鍾愛之家自為師友研經史
寒暑不釋卷嘉定 某甲子 以周禮首鄉薦明年上橋門又
冠之自是氣益雄文益進月書每先諸子鳴聲譽郁天

京矣公以重闡在上不忍去膝下歸而私淑於家四方
士負笈者雲集凡膏潤之所沾丐者莫不歆豔一世貢
於鄉升於學魁於南宮者踵相接其目睫可數者如潘
君忠恕何君夢然兄弟是也十三年以監舉試禮部未
得志歸而益肄業十六年升舍尋擢上第調昭武教官
寶慶甲申龍飛循修職郎旋居雲巖公憂服闋以慶覃
轉文林郎再調和州教官兩易南康兼白鹿書院山長
公教人以踐履為先擇經明行修者列職事以倡每講

說必明界限析義利不專以文義優劣士用以勸當路
如蒙齋袁公留耕王公著齋高公咸剡於朝端平甲午
董文上饒同寮持卷請差次公曰三塲惟策可觀人遂
拔其一及蛻號乃韓君叔穎士論帖然郡太守以擢節
有羨將獻之朝公曰獻羨是逢君也不若以代民輸而
弛其賦守勉從之二年鶴山魏公視師江上聞公而羅
之幕公條陳攻守急務歷犖慷慨魏以遠器目之嘉熙
丁酉調浙東帥幕來赴間京城灾公攢眉時事移書時

相規以省災異量賑卹禁侈靡省營繕數事二年改調
淮東總幕旋為有力者奪之公恬不較歸而復聚徒於
門未幾文清李公當國如京謁選復移書陳時病五事
曰審命令信賞罰擇宰屬久外任選將帥李嘉納焉尋
調臨安鹽倉弊蠹必梏出納必盡情履齋吳公尹京一
見曰管庫豈所以況清流耶檄之幕淳祐辛丑被旨衡
文別頭如洪如葉所得皆知名士四月遷書庫官二年
遷宗諭改秩轉宣教郎三年遷太學博士輪對反覆援

文帝太宗事以諷上首肯之次劄言科舉三事一曰考校拘執之弊二曰謄錄鹵莽之弊三曰彌封易換之弊四年再為別頭考官前列如翁如湯皆公所拔也尋丐外添倅上饒會歲大旱公戚曰吾職勸農奈何視民飢而死也卻交承禮亟走羣望一夕忽雨郡境賴之積訟壓累政不剖者山積皆為盡心一一當曲直民之訟於他司不直者爭願質於公咸曰乞送清強俞太博諸臺交委訟牒雨集一經予奪無反覆者歲再飢公擇大家

勸賑首捐已俸以倡又借公帑為糴本航他境米平其
直以糴徐節他費補償之道有遺孤捐已俸募人收之
民賴全活者衆當路如後村劉公虛齋趙公實齋王公
交薦之五年轉奉議郎會徽及南康乏守朝廷聞公劄
攝徽而當路又命攝南康公俱辭之越月以朝旨之徽
居無何代者已壓境公鑰府庫以俟供給禮例皆却弗
受還任信又闕守復攝事六月朝命以宗正簿召八月
造朝差衡文胄闡撤棘乃領事七年四月遷國子丞以

磨勘轉奉議郎尋考試殿廬得張君

孟博

歲旱副端張

公小坡李公以言去國公以封事爭之不報言者從而
媒孽之遂有主管崇道觀之命八年二月差知常德辭
改知南康又辭不許十一年轉朝奉郎南康促代忽除
公大理丞方控辭未行言者已尼之蓋柄國者欲奪公
南康以畀姍姍故神其操縱如此尋再與公郡公悟遂
丐祠以老杜門絕客菽水之外惟以書史自娛同志或
為怏怏公無悶焉寶祐癸丑元日上掛冠請越六日俄

疾革夜半呼子弟握手叮嚀不及他事惟曰吾負吾母
不得終子職若能竭力事吾母汝父死不死矣言訖而
逝蓋二月之七日也享年六十有七娶秦氏封安人子
一澤民見待省進士女一適何應孫孫一松壽公生山
水邑人物清苦而堅孝友根於天性學問勉於躬行雲
巖公抱恙晨夕奉藥衣不解帶居喪盡禮哀毀骨立祖
父母喪代終大事必盡禮外舅姑亡家窶喪弗克舉厚
助之皆有歸里東孔道病涉捐金鳩衆梁而屋之其待

人接物睦族展親居鄉交隣靡不輯順度量寬容喜怒
不形辭色遇事剛果不為禍福怖自奉儉約菲衣糲食
破窓敗几澹如也居家莅官未之改性不嗜飲賓至必
設醴論文著述凡一十五卷號南疇集九月丙午奉襄
於生仙鄉之傳巖予與公雖不面而心知敬則舊公之
孤謁予序羣玉丐狀公行予焉辭輒銘之曰讀公之文
兮金聲即公之行兮天成桐江之山公之名桐江之水
公之心山之不動兮不以震撼而重輕嚴灘之冷冷兮

或為公而不平悠悠蒼天殲我良人

恭人邵氏墓誌銘

恭人邵氏者中奉大夫尚書吏部侍郎兼中書舍人兼同修國史實錄院同修撰兼侍讀方逢辰之妻乃吾母夫人之姪也名滿父曰彌高為嚴陵之知名士生於嘉定十六年癸未六月十日以淳祐辛丑歸於我寶祐甲寅以夫有位於朝封孺人越二年丙辰八月二十有三日以疾卒年甫三十四也明年丁巳贈安人咸淳丙寅

贈宜人又三年己巳贈恭人男三人國孫夢孫鄱孫女
三人省女福女子女咸淳九年九月二十五日甲辰葬
於龍山之北曰汪尖山下去家僅十里逢辰銘之曰夫
人之家世種福田乃生爾姑為女聖賢又生夫人秉心
塞淵如何蒼天乃不假年三十有四已埋於阡後數百
世陵谷變遷君子鑒茲為我掩焉

有宋方公翠坡先生方母安人潘氏墓誌

公之冢子於逢辰為姪婿其冢婦又逢辰表女兄也孤

子杰來為公請一言以表於墓予何辭公姓方吾宗之
典刑者也諱天驥字龍友娶潘氏公人物礫砢倜儻少
年場屋有雋聲屢膺亞選幾戰胄闡居家奉親孝故乃
翁壽至百歲教子篤孝方二鵠皆讀書世其家居鄉里
質直好義每持公論以裁物凡人有不平者輒質平焉
人多德公晚年酷好恬靜幅巾竹林之下自號翠坡老
子閉門淨掃一室讀史觀詩暇則閱老佛氏書每語人
曰老佛氏之言與吾儒相近蓋喜老氏知止之論與佛

氏有誘人為善之意其霜降冰涸之年孳孳之好如此
夫潘氏安人生於詩禮之門幼失所恃事叔孀如母然
在室清貞淑謹父疾革嘗割股以療之孝感神明長以
年德擇對來嬪於方安人孝事舅姑義處姻族無違夫
子撫育諸男女恩愛如一翠坡翁治身理家待人接物
其善德令聞安人內助之功為多焉子二人長壯猶娶
莘田邵氏孫一人會老俱亡次本逢辰曾帶行應試娶
府城陳氏又高坊某之甥女也孫一人嗣老翠坡翁生

於慶元乙卯卒於寶祐丙辰安人生於丙辰卒於庚午
男齒卜其宅兆以甲戌十一月合葬於進賢鄉之二龍
塢

童會卿墓銘

童會卿之孤泳元翁館於家塾泣請曰泳先人生於某
年某月某日以咸淳己巳五月某日卒家貧未克葬越
八年丙子宇宙大故先人弊廬為盜焚毀兄弟僅克以
死獲殯今以某年某月某日葬於某所蓋祔先妣兆域

從先志也請予為銘元翁每與予言乃翁自七八歲失
母隨父東西寄學於大家之塾逮長卓有立志處里族
篤以睦交朋友實以遜雖遇田夫孺子不敢慢人亦敬
而親之數奇不偶以秀才終其身予惟人之才與學與
丈天不苟以畀人也降衷之初其性善同而智愚賢不
肖之質則有異有其質而無學無文者又滔滔也豈非
天降生民不畹其性而獨於文與學不肯多以與人乎
自宇宙變革以來士不守其業臨難苟免衣冠降於皂

樞之下獨會卿家守其文學自其父業於是今其子又業於是其孫又業於是天之所甚嗇而不肯苟以與人者乃獨鍾於會卿耶會卿諱驤龍安項氏江州湖口宰女姪也子泳次某中子早卒孫某銘曰先民有言既富方穀世變日下貧乃其福三后之姓高岸為谷窮士之家守志彌篤四世讀書一簞自足後君百世尚有膏馥

蛟峯文集卷七

欽定四庫全書

蛟峯文集卷八

附山房遺文

宋 方逢振 撰

瑞粟圖序

青溪之近郊有粟一莖而兩穗者三四穗者民若士合辭以慶於長官學正宮大用率諸生以其圖來諗俾予敘其歲月予曰異哉邑之嘉瑞也昔張君之治漁陽雨暘時若嘉穀生百姓歌之曰張君為政麥穗兩岐載在

簡冊吏治熒然有光觀史者誦之而已未嘗得於目擊
今粟穗兩歧秀出於素當年盛美復見於茲得非善政
感召而然歟民曰續我大命時尹之休士曰大和尹實
有之尹不自有歸之太守太守曰於戲非守若尹之力
聖君賢相之德予聞之喜於是乎書以備觀風使者之
采錄云

瀟洒集序

瀟洒集者復心汪稱隱之吟卷也瀟洒者何吾州名也

州曷為曰瀟洒文正范公守是州日名之而稱隱取以
名其集也稱隱歟人為州學正年妙而工於吟來吾州
曾幾何時錦囊已成巨帙訪予臥病中屬之叙其端予
曰噫柳柳州以愚自名溪池丘島無往而不愚是邦瀟
洒樓亭泉石無往而不瀟洒凡仕於斯歌於斯先後來
不知瀟洒幾人矣今又將瀟洒子之詩挾冊讀之大篇
淡而不失之枯小篇奇而不流於怪其為人楚楚洒洒
可見其中之飛雪層冰矣是則稱隱之詩又不專以吾

州得名也雖然先賢所謂瀟洒者山水云乎哉子陵一絲之風凜凜千古吾州之得名以此子為正亞博士一等皋比得分半席以講授餘閒率冠者五六童子六七徜徉乎逝川之水涵咏乎舞雩之風蟬蛻而春融籟鳴而機動即其鳶飛魚躍體認其活潑潑者悠然思超然覽心領而躬行之是則吾之所謂瀟洒者也子其勉之

揚州盛恕齋吟藁序

杜少陵昔與李太白高書記遊時衛八處士年最妙呼

為小友後二十年少陵有詩贈之曰少壯能幾時鬢髮
各已蒼又曰訪舊半為鬼驚呼熱中腸前輩羈窮流落
之餘不遺故舊如此子少從軍淮海時盛君之年妙之
又妙子且未得友之矧敢小越二十有五年以吟藁索
子於萬山深處屬之敘追省舊遊恍若隔世斯可見少
而壯壯而老曾日月之幾何而天地不能以一瞬也噫
予衰久矣蓋自辛未放還抱痼疾臥空山垂盡無幾平
生往事不復夢見壁上龍蛇化為塵土江流浩浩逝者

如斯然而天機動處元無古今固自有不毀不滅不逝而往者不知於何乎寄栖霞寄於剡瓊花寄於祠道鄉四柏之風操誰與守今吾得是編然後知舞雩之下猶有鏗爾而作超然獨見之吟弄而歸則夫楚山之雲秦淮之水二十四橋之風月始有所寄而不孤子其勉之蔽自三百篇而下本乎六義以觀所感究乎四始以考其成而又探之騷以致其幽博之西晉晚唐以廣其趣然後約之李杜歐蘇以會其指歸囊括造物之無盡藏

者散為太平風露庶幾永與坡後四學士齊名使觀是
編者曰此嚴陵方某二十五年前從軍時所不敢小友
之者也

普安寺記

佛廬於青溪者凡三十有九而盂粥盆飯則普安為第
一予築室讀書清風潭上順流以東三里折而北又五
里復折而南峯斷流分有峯隆然起而偃倭以伏若虎
踞熊臥橫絕二流之會以控淳遂蒼藤古木蕭然翳蔽

而普安刹為翠岩千尺別是人世出林跬步即翕翕熱
熱僧遊其間非鐵肝汗脅鮮有不動心者予丙子避地
於杭越明年寇平纜舟西上而過之則廬已火於盜但
見寒烟斷礎荒草頽垣而已四顧聞其無人旁有室斗
大煢然一衲如孤雲野鶴悽其憔悴儼繪像而事之子
為之愴然歸舊隱且十年有僧復禮訪予於清風潭上
問向所經從則雲棟雪脊真然一新矣問昔之煢然憔
悴造次顛沛於是者誰歟曰禮也問今之輪奐翬飛幻

出於寒烟荒草者誰歟曰禮也禮率其徒搏節粥飯苦心殫力以濟登茲鐘樓藏宇創於庚辰佛殿法堂建於癸未僧舍兩廡廚庫成於丙戌禮之來求以記歲月云爾予嘉其流離困踣不忘所事堅忍強耐以復厥初於是喟然嘆曰凡物廢興成敗不可得而知也天高地下往古來今一興一仆一起一滅消而長長而消相尋於無窮此豈可得而知哉蓋自有不以興仆起滅消長而為之消長者則存乎人

靜樂先生祠堂碑

淳安縣常樂鄉上貴寺靜樂祠堂者唐處士靜樂先生
方公聚徒授業之所也先生生於唐末以節義自高唐
亡恥非所事持峻行不屈五代之吳越錢氏招之不往
遯於深山讀書講道以終老焉昔宋咸淳明堂詔書求
歷代忠臣烈士有功於民者令州縣歲時祭祠時知縣
事承議郎應應偶發錢一千緡下本寺助造佛廬就其
中為先生祠從衆請也越數年國家更代宇宙且運而

往獨前代名人遺迹不許廢墜先生之祠如故嗚呼先生之道與天地相為久長豈特子若孫世守之邦人士聞先生之風凜凜如生亦足以為勸

王道以德義生民賦

王立民命道於福基念本根之係此即德義以生之坦然至正之彝理皆日用推此可遵之實人遂春熙聖人出而胎一世之春天理乃壽羣黎之地惟寬平正大事事無擾故涵育渾融元元咸遂王維知此宵旰之念在

斯民道豈他哉德義之中有生意觀夫洪範其建騶虞以成無反無側以修以明非屑屑以力假非區區於利征萬端皆正此洪範之攸建纖芥不仁豈騶虞之大成此王者能自得師孰是顧所行之本要先為益俾遂莫不壽之情生者可養期無憾烏可以不厚欲惟和種豈容於罔克有大孕育無窮保息尊以不傷是即罔砥礪而欲並闕無禹拯觀彌滿天下民所蒙福見胚胎春意義之與德者眇以飭修之始莫匪常行納夫人心歸

悅之中疇非允殖大抵一毫悖理此豈粹王之道萬宇
皆春莫非吾道之功故仁壽多在帝治醇醲之際而糜
爛每基於伯圖功利之中王乃網審其執貫民所同極
予遵而汝免短凶之咎仁我行而爾無鄙天之風使王
民之皞皞如是見道之生生不窮情本欲安事自商湯
之制典因以任教由成后之道是道也在商為極惟以
用康於夏曰中形而允治春風惟政之德時雨行師之
義用能蘇怨徯之困漿食西北拯瘠捐之命蠶桑充冀

奈千載以來亦幾斯道之泯幸一王者作而受更生之
賜如或憂沈其命當不任刑儻令念爾推肌勿交征利
嘗論衆形皆有弊理獨不朽壞證苟弗除脉終未蘇胡
乃括田非義也忍矣膏腴之奪科斂薄德也傷哉疲弊
之敷曾不曰怨已滿腹剝將及膚不去斯二者使承蘇
也則生之一脉殆將斬乎當令化致幽原壽一農夫之
必介仁先政邑餒宜老者之無噫滅義非可怒曷怒商
頑敗德不必誅曷誅苗蠹衆芳同植育則兼育一物獨

枯忍與不忍王者若曰順吾德義者則施以春生之惠
梗吾德義者則示以秋殺之威道宜兩盡噫陶物以古
治固善胚暉賢國用盜臣反滋殘忍毋管晏術行斬民
命於箕箒毋孔桑利折股民脂於平準否則遏絕生意
小人未去皆足為吾民之巨蠹焉斯道奚其能盡

冠二子說

冠義曰凡人之所以為人者禮義也禮義之始在於正
容體齊顏色順辭令容體正顏色齊辭令順而後禮義

備以正君臣親父子和長幼君臣正父子親長幼和而後禮義立故冠而後服備服備而後容體正顏色齊辭令順故曰冠者禮之始也

冠義一篇首及禮義而不先之以冠禮義備可矣未也必禮義立然後始及於冠冠其可以不重乎冠者大人之服古者二十而冠十九而下皆得為童子一服大人之服則與童子辭矣安得不重之哉人之所以異於禽獸者以其有禮義也男子生能飲食教之

右手能言教之唯諾六歲教之數與方名七歲教之
能別八歲教之能讓十歲學幼儀十三學誦成童學
舞射御其為教不離乎容體顏色辭令之間以常情
觀之正容體齊顏色順辭令初無甚高難行今自能
食能言至於由小學而大學歲月若是其久工夫若
是其深豈徒苦其心志哉蓋大人之坯樸已造於此
容體正顏色齊辭令順至於禮義始備以之正君臣
而君臣可正以之親父子而父子可親以之和長幼

而長幼可和至於禮義立矣然後加之大人之服故
曰冠而后服備其與童子異也然所以異於童子者
軀殼云乎哉蓋必有事既冠以往三十而有室則將
有父道焉四十而莅官則將有君道焉生乎吾後者
先吾則將有兄長之道焉回視二十以前所學何學
則當惕然警悱然發痛自督厲曰正容體容體果正
歟齊顏色顏色果齊歟順辭令辭令果順歟必能盡
乎為人子而後可以為人父能盡乎為人臣而後可

以為人君能盡乎為人幼而後可以為人長所謂大
人之事者蓋如此曾子自少而壯壯而老一生涵養
工夫見於動容貌正顏色出辭氣三事直至全而歸
之方知免夫善乎士冠禮三加之祝曰棄爾幼志又
曰介爾壽考曰敬爾威儀又曰慎爾黃耆人生之歲
月易老天下之義理無窮髫髻黻習之有餘頭白行之
不足古人於加冠之始不得不致丁寧告戒之意蓋
終身大人之學方自此發軔故又終之曰冠者禮之

始也後世冠禮廢童子與先生並行遜讓之節既不防閑於幼穉之時修治之方又不謹嚴於行冠之始此人才所以難成而教道所以戛戛乎難入愚重有感焉故於二子之冠繹其大義而申言之 正容體

持已處要端儼以守

齊顏色

接物時要矜莊以莅之使外賊無自而入順

辭令

出辭氣時要審以發守如惡言不出忿言不反出必顧行重必然諾大學曰言悖而出亦悖而

入即此便是不順

弩有機謹而後發知動知微者其為機

乎和孫名汝曰機字汝可度

戶有樞運則不蠹知

闔知闢者其為樞乎良孫名汝曰樞字汝可達

遣禮往項氏書

某端拜申稟某惟至敬無文大圭不琢大羹不和件列
長儀非古者是用盡芟繁蕪而一致情悃惟高明先之
以察某切謂婚姻人道之始禮之本也易之咸詩之時
禮之醺且命所以重本謹始也嫁女之家三夜不息燭
思相離也取婦之家三日不舉樂以著代也古人致嚴
之婚禮蓋如此顧今天地變人道缺綱常之寄在吾黨

所以立斯道者亦有仁義而已矣共惟親家令聞在躬而惇善積之本義方篤教而開德潤之基寒緒之於華宗以世俗論齊大豈偶而純誠厚德所尚則同此門牆之所以下取而蛟峯所以托之子女也某亦既送姪女出就車雖以其未克羞蘋藻為憂然既獲執棗栗以見云乎不喜薄禮將敬采菲斯榮心之精微言不能盡伏乞台照

峽中和卜彥才韻

尹躬樂不在耕莘樂在明明以及民貪看回頭多應錯
偶聞變色始知真聖賢氣象心為大天地根萌人是仁
認著濂溪牕草意自家胸次一般春

峽塾講中庸第二章詩

滔滔逝者若斯夫不有耆儒孰共扶昭揭五條皆達道
由來一本不殊途聖賢與義難窮盡老筆名言妙寫模
我欲研硃同點易先生肯位此中無

次盧月山賀建造韻

轍雪營巢近歲除樵奴溪友落成初卜隣喜有玉川子
作計拚為陶隱居架上多儲韓杜卷案頭不著老莊書

乾坤自有關心事非是幽人偏愛廬

山房歸隱卜築清風潭上與賡爵廬

氏之居直一葦之隔爾故詩云卜隣喜有玉川子也

至元廿四年十一月二十日得宣命詣朝可菴有

詩不敢當次韻以謝

雪棹殷勤泛剡溪吟香為拂案頭埃老軀久已乞骸去
瘦骨應難入畫來但願東皇憐病瘦早從西華覓雲臺

當年自是渠無分明主何曾棄不才

抱琴來會錦沙溪音響能清一世埃不學晉人反招隱
頗知陶令欲歸來羨君雪裏騎驢興哀我年前戲馬臺
留取老翁看雲月乾坤撐拓賴奇才

風潭精舍月夜偶成

先生山房
之號本此

茅屋三間一塢雲此窩真足養吾神不知逐鹿斷蛇手
但見落花啼鳥春石几梅瓶添水活地爐茶鼎煮泉新
古今天地何窮盡愧我其間作散人

挽諫坡居士

諫議村中一布衾幽潛兩事最堪稱
瘞骸鬼結來生草削髮僧然後夜燈
螭篆淒涼嗟老鈍薤章鳴咽動親朋
羨公有子能如此多少英雄叫不應

贈相士葉秋月

麻衣道眼明如月學士神仙帶不來
天上貴人若相問只消三字畫爐灰

江湖穩處

於潛寺僧

此舟無物本來虛萬斛清香只有詩昨夜潮頭高幾丈
老僧睡著不曾知

贈山屋相士

我有一部相法在無言處顙欲圓趾欲方耳欲聰目欲
明鼻孔欲別香臭其形肖者為上相目重瞳以迄於今
睿者秀者高年者孤幼者顛連無告者不知相中幾千
萬萬矣惟不肖者不入相我昨日病期汝明發來當相
傳授如期汝果至是或可教與之詩曰圓顙方趾具仁

端性體由來只一般若見裏頭腔子黑相書已作死人
看汝持是法以往十希八九矣

悼亡祕書

翠華東南來奎聚屬吳域分王百餘年靈光赫天德龍
文發南源圖書粲東壁誰折天罅開猝忽正氣泄剖藏
發金櫃抉蘊破石室籤怕逐汗牛奎珍去遐絕我欲然
藜人四庫亦赤立細人慕所愛但嗟珠玉翼君子為道
謀惟憂孔孟北風氣日已趨南強變金革周禮吾能言

欲徵恐無籍落落星向晨後生當努力

毛伯玉以六月廿七日來訪是年天不雨梅亢熱
異常書數韻述懷且以贈之

伯玉不我過過我必六月老天雨不梅五行一乃絕亢
離單用事赤烏赤如血人寰何辜辜幾欲炮烙殺左手
解衣襟右手不停筴脫帽無奈何而況可腰折西望禽
鬼焦東望金魚涸前山牛眠洿亦復如火發相攜將安
之只合坐論說伯玉老先輩家傳洞林訣談辯管郭雄

五鬼皆避易借君鐵拄杖蹴踏六月雪為我買雪山斲
冰作天穴

庚寅人日雨夕大雷電激而成電陽專而陰不勝
寒反為燠復雷電大雨彌旬燠極而霰繼以大雪
三日深山盈丈自人日至晦凡二十三日雨電霰
雪農民告苦為二十韻以記之

龍馬交戰相長雄一勝一負互始終二氣脅擊威力窮
凝冰迸出焦火中跳丸飛砲怒打空一夜白盡千頭峯

頃田十萬銀裹封東皇未肯開冶鎔山眩水晃人滅蹤
癡猿凍鶴驚折松鄰雞失旦僧懶鐘昏曉不辨天地聾
鹽虎坐險終陷凶獰獅見日空眼紅書生徑臥身龍鍾
諷諫不到齊王宮灞陵無驢句不工萬象醜怪難形容
我聞古語盈尺豐今深一丈愁殺農欲將此意問天公
天公高高高幾重

翰林將指下學峽賓聲叟為諸友先雨雪載途民
亦勞止一詩懷之

空山雪片大如盤有客遠在孤館眠翰林喝馬不到地
白帝叱馭親行鞭疾驅滕六笞飛廉六花急舞狂且顛
玉皇香案口讀宣深衣大帶依然仙東里先生履欲穿
濕透布襪枵囊纏高談雄辯鑪亭邊不有義意誰肯前
陽羨山中春信傳兩驂已發垂虹鞭諸君急棹山陰船
子猷逸興今翻然

茶具一贊鮮于伯機

惠山天下第一泉陽羨百草不敢先二絕獨與端石便

不受翠鐵黃金煎古來風韻擅玉川日高丈五猶打眠
山中舊事今不然石鉋不在坡爐塼伯機卓犖美少年
好官不做自取廉床頭月俸無一錢手續陸羽經二篇
我有片石出古端斤師斲成無脚鐺為君置之書几邊
自汲活水烹新烟不待七碗肌骨仙飛去玉皇香案前
天公高高望眼穿百姓墮落深深淵無人敢說江南天

示湖田菴僧

湖田菴乃耐
軒先生墓所

千里渴驥奔橫川萬松滴翠蜿蜒盤我來廬墓分一龕

紙窓搖動卓錫泉鑄鐘靴鼓買祭田雲冠雪衲聊結緣
崑崙石壁蛟龍淵呵禁守護靈物專六根五蘊洗不蠲
山鬼不肯降太顛內熱正坐飢火煎睡蛇滅盡方安眠
君不見瀉山禪剛把鐵牛鼻孔穿犯人禾稼痛撻鞭常
見迴迴在我前又不見高公鬼天遣妖魔下玉輶試我
楞壁堅不知死灰無復燃我遊諸方三十年出入無界
叅人天不羨翬飛紺碧捐金錢不羨高堂會食羅大千
只羨當年開山祖師賢

送姪隆吉作遂安教諭

舊時州置文學掾南宮集英大學選英雄壯志必此爭

飯囊郡庠奴隸縣今時學籍難登天青山

闕

老天厭

蟻旋驢磨猶自癡不釋不玄良覺窘南州諭缺數百員


得即忻忻不得愠他年正錄繇此遷視博士員居四緊

博士以上梯級危仕至泮宮鑽天令小阮膽大志復狂

拔起泥中尤自奮不顧在列嘲好為濫取舉比得家便

天上知心愛屋烏尚覺知心相勉勸弘文弟子需補員

徑合翰林集賢院我欲勸子入翰林却恐遠嫁難為情



蛟峯文集卷八